



329

R

UT

PNT

REVISTA 7

Polícia Nacional Timor-Leste
Ita nia Polícia 2015 Janeiro
Fevereiro



Editorial	3
Mensajen Komandante Munisípiu Dili	4
Corpo do Aluno ne'e desijaun Komandu	6
PSIK ho PNTL kontrolu krime organizadu	7
PNTL no F-FDTL 288 juramentu hakotu arte marsiais	9
OJE 2015 ba PNTL \$27 Milloens	10
Estatístiku Nasionál Insidente no Tránzitu 2015	11
PNTL Iha asaun	12
BOP iha Oeste atu hamenus krime	14
KJ transfere membru PNTL	15
UPM garante estabilidade kontrolu maximu riku soin	17
PK organiza tara bandu hodi hamenus Krime	18
BOP Bobonaro prontu kualker tempu	20
PM husu PNTL tenke rigor no firmeza	21
Ministru Interior fo nafatin atensaun ba PNTL	22
Ajente rekruta foun 260 hahu formasaun	23

REVISTA **PNTL**

Responsavel Jerál

Komandante Jerál PNTL
Komisáriu Dr. Longinhos Monteiro

Diretór

Komandante Relasaun Públika PNTL
Insp. Xefe Honorio Assis Barreto

Hordenador

Insp. Francisco Martins

Editór

1º Sjt. Julia Moniz
Santino Dare Matias

Jornalista

Fausta da Costa

Grafismu

Ajt. Estevão Pereira

Fotografia

Ajt. Tomas Maia Rodrigues
Ajt. Jeremias dos Santos

Sekretariadu

Sjt. Isac Gago Lopes
Ajt. Agostinho de Araujo
Ajt. Melquiades do Nascimento

Relasaun Públika no Midia PNTL

Rua Jacinto Candido - Caicoli - Dili

Website: **www.pntl.tl**

Email: **koaliaho@pntl.tl**

Nú. Kontaktu: **77 312 433**

77 394 446

77 325 881

sumário

7





Iha 2015 Komandu Polísia Nasionál Timor-Leste (PNTL) firmeza no kontinua fahe informasaun ba públiku kona-ba ativiidade PNTL ninian. Alende ne'e mos revista PNTL halo tinan ida haklaken públiku.

Edisaun premeiru ba tinan ida ne'e foka ba juramentu membru PNTL ho F-FDTL iha Palacio Governu nia oin hodi hakotu relasaun ativiades ho arte marsiais tolu maka hanesan KORKA, PSHT no KERA SAKTI, mensajen Komandante Munisípiu Dili, Suprintendente Xefe Pedro kona-ba passa revista iha postu permanente Metinaro, Hera, Lahane, no Tasi. Ativiades ne'e sei kontinua hala'o nafatin to'o mandatu kapturasaun ba Mauk Moruk ho nia membru sira ne'ebe involve iha krime asaltu ba

elementus PNTL.

Fo hatene mos kona-ba, Superintendente Xefe Hermenegildo da Cruz antes ne'e kaer pasta hanesan Komandante PNTL Munisípiu Bobonaro, nomeadu ba Diretór Nasionál ba Polísia Sientífika Investigasaun Kriminál (PSIK).

Formador Timor oan ne'ebe fo formasaun ba ajente rekruta sira inklui Inspetór Xefe Ambrosio Francisco Gomes, ne'ebe iha tinan 2015 ne'e, sai hanesan Corpo do Aluno tuir desijaun Komandu Jerál. Corpo do Aluno ne'e nia funsaun mak iha responsabilidade másimu ba programa formasaun ba ajente foun sira to'o graduasaun. Instalasaun husi Kompañia Delta BOP iha Postu Maliana, Munisípiu Bobonaro atu fo seguransa iha munisípiu Bobonaro, Kova-lima no Oe-cusse, nomos vizaun Komandante Kompañia Delta BOP Maliana Inspetór Rui de Araujo Freitas.

Ba públiku bele akompañia oinsa PNTL jere rasik ninia orsamentu tuir despaixu ne'ebe Governu hatun ba PNTL. Servisu ida ne'e fo ba Departamentu ida ne'ebe responsavel ba planu no alokasaun ba orsamentu mak Departamentu Finansas no Orsamentu.

Alede ne'e Relasaun Públika mos oferese kona-ba ajente rekruta 260 hahu tuir formasaun no treinamentu baziku durante fulan rua iha Rairobo, Postu Administrativu Atabae, Munisípiu Bobonaro, hodi kompleta número PNTL no reforsa seguransa iha rai laran.

Informa ba públiku kona-ba mensajem ikus Komandante Jerál PNTL, Komisáriu Dr. Longuinhas Monteiro nian bainhira simu kna'ar foun hanesan Ministru Interior nomos vizita Primeiru Ministru VI Governu Konstitusional Dr. Rui de Araujo mai Kuartel Jerál PNTL, Caicoli-Dili. Informa mos serimonia agradesimentu Komandu PNTL ba eis Komandante Jerál PNTL Komisáriu Dr. Longuinhas ne'ebe simu fali pasta foun hanesan Ministru Interior.

Fo hatene ba lee nain sira mos kona-ba ativiades Polisiamentu Komunitária hodi organiza serimonia tara bandu iha mota Ira Bere iha Postu Administrativu Uatucarbau, Munisípiu Vikeke.

Regularmente fo sai estatistika krime no asidente ne'ebe akontese iha territóriu tomak atu nune'e públiku bele hatene hodi tau atensaun ba seguransa ema idak-idak nian.

Obrigadu barak.

Inspetór Xefe Polísia **Honório A. Barreto**
Xefe Relasaun Públika PNTL

Foto kapa

Ajente Rekruta foun tuir treinamentu Ordem Unida ho armas iha Rairobo

Entidade hotu tenke

kolabora ho **PNTL** ba passa revista

Akontesimentu ne'ebe mosu iha loron 15 Janeiru iha Suku Saelari, sub- distritu Laga, Munisípiu Baucau, ne'ebe hala'o husi membru grupu ilegál Mauk Moruk nian hodi hadau pistola 2, sunu karreta PNTL 1 husi eskuadra Postu Administrativu Laga nian, nomos membru PNTL iha eskuadra Laga sai vítima ba akontesimentu ne'e.

Akontesimentu ne'e halo comunidade iha área ne'eba sente ta'uk no trauma no balun evakua husi sira nia hela fatin. Ho nune'e Komandu Jerál PNTL halo karta Diretiva ho no.5/CG-PNTL/I/2015 hodi fo ordem ba Komandu PNTL Distritu 13 atu alerta no halo passa revista ba iha ida-idak nia área atu nune'e membru grupu Mauk Moruk ne'ebe diskonfia involve iha akontesimentu ne'e labele halai sai.

Área juridiku Komandu PNTL Munisipiu Dili hodi hala'o passa revista mak hanesan Metinaro, Hera, Lahane, no Tasi tolu, ida ne'e postu permanente ne'ebe halo passa revista, maibe iha mos auto stop movel ne'ebe halo mos iha Dili iha fatin ne'ebe la permanente. Passa revista ne'e sei kontinua hala'o nafatin to'o kapturasaun ba Mauk Moruk ho nia membru sira ne'ebe involve tuir mandadu ne'ebe fo sai husi Ministeriu Públiku.

Passa revista ba pasajeiru sira ne'ebe husi munisipiu mai Dili no Dili ba munisipiu ho nia objetivu atu buka sasan kro'at sira no buka membru grupu Mauk Moruk ne'ebe mak diskonfia iha ona. Iha passa revista husu liuliu sidadaun sira nia kartaun eleitoral tamba membru grupu Mauk Moruk maioria laiha kartaun eleitoral no husu pasajeiru sira nia objetivu viajen.

Durante halo passa revista, konsege kaptura membru na'in 1 husi grupu Mauk Moruk nian iha Metinaro-Dili ne'ebe agora submete ona ba Tribunal Munisipiu Baucau, kaptura ema na'in 2 ne'ebe ho kartaun eleitoral falsu (la'os husi STAE) no kaptura membru arte marsiais na'in 1 ne'ebe lori atributu arte marsiais nian, ne'ebe ninia prosesu hodi lori ba tribunal alende ne'e konsege kaptura ema estranjeiru husi Atambua-Indonézia nian 1 ne'ebe laiha pasaporte atu ba Baucau, ne'ebe intrega ona ba parte Servisu Migrasaun atu prosesa.

Liu husi passa revista konsege prende kro'at sira hanesan katana 33, tudik 74, sabit (tudik kle'uk) 3, tudik kris 6, double stick 1, baliu 1, besi ulir 1, tijora 33, kilat musan manu nian dos 2, kada dos iha kilat musan 50 no pasajeiru sira ne'ebe la lori kartaun eleitoral hamutuk ema na'in 1.360.

Husu ba entidade hotu-hotu tantu membru deputadu, membru governu mak hala'o viajen husi Dili ba munisipiu no munisipiu mai Dili, bainhira membru polisia halo para labele kontra, presiza tebes ema hotu nia kolaborasaun. Fo avisu mos bainhira hala'o viajen keta haluha lori kartaun identidade, dokumentus karreta ka motor nian atu nune'e husu karik bele hatudu.

Dala ruma membru orgaun soberanu sira balun, membru polisia husu atu para, maibe membru soberanu sira sempre halo lamentasaun maibe favor ida, ida ne'e polisia nia servisu halo *auto stop* no kumpri ordem, ida ne'e funsaun polisia nian iha tereinu iha situasaun hanesan ne'e.

Obrigadu barak...!!!

Superintendente Xefe Polisia, **Pedro Belo**
Komandante PNTL Distritu Dili

mensajen



Corpo do Aluno, ne'e desijaun Komandu

"Ita atu hakarak ka lakohi, bainhira desijaun husi Komandu katak atu sai hanesan Komandante, Xefe ka sai Corpo do Aluno, ita tenke simu hodi hala'o servisu ne'ebe fo mai ita, tamba ne'e ordem ita tenke halo tuir."

Inspetór Xefe Polísia, **Ambrosio Francisco Gomes**
Corpo do Aluno iha CFP-2015

Sai membru ba instituisaun Polísia Nasionál Timor-Leste (PNTL) la'os fasil, tamba liu husi dalan ne'ebe susar tebetes mak hanesan liu husi rekrutamentu ne'ebe rigoroza, kondisaun fíziku, saúde tenke di'ak, nomos mentalidade diak.

Bainhira liu ona teste hirak ne'e, molok sai membru polísia sei liu husi formasaun iha academia Polísia atu nune'e bele iha koñesimentu di'ak kona ba servisu polísia nian.

Hafoin tuir formasaun kompletu no simu graduasaun mak bele dehan sai duni membru polísia ida, hodi kumpri ordem atu servi no proteje povu no asaun Timor-Leste.

Membru polísia sira ne'ebe hala'o kna'ar iha instituisaun Polísia, la'os hatene deit oinsa atu kaptura ema, oinsa fo protesau ba vitima sira, ajuda vitima ne'ebe hetan asidente ka hetan problema ruma, fo edukasaun sivika kona ba sinais tranzitu ba kondutor, comunidade, no estudante sira, maibe sai polísia iha mos servisu seluk ne'ebe bele hala'o hanesan polísia sai belun di'ak ba comunidade, servisu iha área investigasaun, Informasaun teknolojia, aprovizionamentu, halo manutensaun ba veíku, Administrasaun no planeamentu, Financas no Orsamentu, kontrola tasi no fronteira, no seluk tan.

Atu treina agentes foun sira hodi servisu iha área hirak ne'e mak, liu husi Centru Formasaun Polísia hodi bele hetan treinamentu báziku ba área hirak ne'e, atu nune'e bainhira simu graduasaun, agentes sira bele koloka ba área sira ne'e hodi bele reforsa servisu iha nasional nomos iha munisípiu.

Dezde uluk, formador ne'ebe fo formasaun ba ajente foun sira mai husi Guarda Nacional Republicana (GNR) husi Portugal mak fo formasaun, maibe iha tinan kotuk no tinan ne'e, GNR sai deit hanesan asistensia formador tamba iha ona membru PNTL ne'ebe pruntu atu fo fali formasaun ba nia maluk polísia foun sira ho nune'e PNTL iha orgullu boot.

Formador Timor oan ne'ebe iha Centru Formasaun Polísia mak inklui Inspetór Xefe Ambrosio Francisco Gomes, ne'ebe iha tinan 2015 ne'e, sai hanesan Corpo do Aluno tuir desijaun Komandu Jerál. Corpo do Aluno ne'e nia funsaun mak iha responsabilidade másimu ba programa formasaun ba ajente foun sira to'o graduasaun.

Corpo do Aluno mak dirije no organiza ninia membru Instrutór sira, hodi fo formasaun ba ajente rekruta foun

sira durante iha Rairobo no iha Academia Polísia. Kritériu sai Corpo do Aluno tenke sai formadór iha CFP ho deviza Inspetór Xefe.

Antes Ambrosio sai Corpo do Aluno, nia hanesan formador iha Centru Formasaun. Iha tinan 2012, Ambrosio sai hanesan komandante pelotaun ba formasaun ba ajente rekruta foun sira.

Iha 2013 simu kna'ar hanesan Komandante Segundu Kompañia ba formasaun ba ajente rekruta foun sira, iha tinan 2014 hetan tan fiar hodi sai hanesan Xefe Seksaun Armamentu retiru nian, aleinde ne'e mos nu'udar Instrutór ne'ebe hanorin kona ba investigasaun nomos treinamentu ba arma nian.

"Molok ha'u sai Corpo do aluno, antes ne'e ha'u hanesan formador iha Centru Formasaun ne'ebe hanorin kona ba investigasaun no treinamentu ba arma nian, ha'u nia pozisaun atual hanesan Xefe Seksaun treinamentu armas, maske hanesan xefe Seksaun maibe desijaun husi Komandu dehan katak atu sai Corpo do Aluno, hakarak ka lakohi tenke simu tamba ne'e ordem tenke ezejuta," tenik Gomes iha Rairobo.

Iha 2015, Inspetór Xefe Ambrosio mak hanesan Corpo do Aluno, hamutuk ho nia membru Instrutor Polísia Timor oan hamutuk na'in 47 (hatnulu resin hitu) no akompañia ho Guarda Nacional Republicana (GNR) hamutuk na'in 9 (sia) mak fo formasaun ba kadetes foun sira durante tinan ida iha Rairobo no iha academia Polísia-Dili.

Matéria ne'ebe kadetes foun sira atu aprende durante formasaun mak hanesan matéria sidadania Polísia, topografia, tatika operasaun, edukasaun fizika, no armas.

"Ami presija fo formasaun ba sira tamba sira maioria mai husi sociedade ne'ebe sivil, atu sai polísia ida no hatene servisu polísia nian, tenke liu husi formasaun atu nune'e bele iha koñesimentu ne'ebe di'ak, hafoin kursu báziku, sei iha fali tan kursu especialidade ba sira." Gomes esplikia.

Ikus liu, Ambrosio Gomes hato'o mensajen ba juventude sira ne'ebe iha talenta atu sai polísia, tenke kuidadu an, labele involve iha krime, livre husi droga, labele hemu tua no labele fuma. Ida ne'e kriteria báziku ba juventude sira bainhira iha tan rekrutamentu ba agentes foun.

PSIK ho PNTL

kontrollu krime organizadu

“Ha’u agradese tamba hetan fiar husi estadu, individualmente ha’u sente ho nomeiasaun ne’e todan teb-tebes, maibe ho prinsípiu hau sei esforsu-an, komitmentu no hamutuk ho ha’u nia funsionáriu sira hodi ajuda dezenvolve rai ida ne’e, defende povu no nasaun, hakarak nasaun ida ne’ebe soberanu no independente, liu husi instituisaun foun ida ne’e bele garantia ita nia independente.”

Superintendente Xefe Polísia, **Hermenegildo Gonçalves da Cruz**
Diretór Nasionál Polísia Sientífika Investigasaun Kriminál (PSIK)



Superintendente Xefe Hermenegildo da Cruz antes ne’e kaer pasta hanesan Komandante PNTL Munisípiu Bobonaro, nomeadu ba Diretór Nasionál ba Polísia Sientífika Investigasaun Kriminál (PSIK) ne’ebe posse hamutuk ho nia funsionariu hamutuk na’in 78, kompostu husi investigador na’in 47 no espesialista 31, iha Salão Nobre Ministériu Negosiu Estranjeiru no Kooperasaun Dili, lora 30 Janeiru foin lalais ne’e.

Eis Komandante PNTL Bobonaro ne’e hetan nomeisaun direita husi Primeiru Ministru Kay Rala Xanana Gusmão hodi assume kna’ar hanesan Diretór Nasionál PSIK durante tinan rua nia laran ba oin, PSIK hamahan-an iha Ministeriu Justisa departamentu ne’e foin mak loke.

Diretór Nasionál PSIK Hermenegildo da Cruz iha nia diskursu hateten, PSIK hanesan Instituisaun superior ba investigasaun kriminál servisu hamutuk ho PNTL hodi bele prevene no

kombate ba krime ne’ebe organizadu, modernizadu no kompleksu.

“Ha’u simu kna’ar husi estadu ida ne’e, kna’ar ne’ebe todan tamba ba oin PSIK hanesan instituisaun superior ba investigasaun kriminal hodi hasoru dezafiu ne’ebe nasaun TL hasoru iha kontestu dezenvolvimentu sosio ekonomiku ne’ebe bele hamosu forma kriminalidade foun, modernizadu, organizadu, no kompleksu,” afirma Hermenegildo.

Supt. Xefe Hermenegildo hatutan, ho krime foun hirak ne’e mak PSIK hamrik hodi prevene no kontinua kombate, hodi nune’e ita nia rai doben Timor-Leste no povu bele moris iha paz no estabilidade nia laran, kontinua hamriik nu’udar nasaun ida ne’ebe independente no soberanu.

“Ema hotu nia matan sei tau mai ha’u maibe dezafiu barak mak sei mosu hanesan rekursu umanus, espesialista naton hodi funsionamentu laboratoriu, espesialista iha área toksikolojika, medikolojika, patolojia, forensika, fasilidade, infraestrutura, teknolojia informátika, no seluk tan, no molok atu hala’o ami nia servisu ami sei halo estudu ida atu nune’e bele kria ami nia planu estratéjiku, nomos funsionariu sira sei kontinua tuir formasaun atu bele aumenta tan sira nia kapasidade iha área ida-idak nian atu bele hala’o servisu ho di’ak,” tenik Diretór PSIK.

Iha parte seluk, Ministru Justisa Dionisio Babo hateten, PSIK hanesan instituisaun ida ne’ebe sei servisu iha área espesializada hanesan forensika, droga, teste DNA, teste balistiku, autopsia, brankeamentu kapital, no seluk tan.

“PSIK hanesan polísia ida nebe la uja farda, ne’ebe halo servisu espesializada ba análise forensika, droga, teste DNA, teste balistiku, autopsia, brankeamentu kapital, no seluk tan, sira hala’o servisu ne’ebe espesializada tamba durante ne’e teste DNA ita haruka ba iha Portugal maibe agora PSIK bele hala’o mesak tamba iha ona fasilidade hanesan laboratoriu ne’ebe apoiu husi Uniaun Europeia,” esplika Dionisio.

Hafoin tomada de posse Diretór Nasionál no funsionariu, PNTL ho PSIK asina protokolu servisu ne’ebe asina husi Ministru Defeza no Seguransa Xanana Gusmão representa PNTL, no Ministru Justisa Dionisio Babo representa PSIK.

Diferensia servisu entre PNTL ho PSIK mak hanesan PNTL sei kontinua nafatin hala’o nia kna’ar ne’ebe durante ne’e hala’o hanesan halo atendimentu ho investigasaun ba kazu violénsia doméstika, asaltu integridade fizika simples, omesidui, no seluk tan. PSIK nia kna’ar mak sei haree liu ba krime ne’ebe organizadu, modernizadu no kompleksu liu.



Foto Thomas Maia Rodrigues/PNTL

PNTL no F-FDTL 288 juramentu hodi hakotu ho arte marsiais

Membru PNTL no F-FDTL ne'ebe involve iha arte marsiais halo juramentu iha Palacio Governu nia oin hodi hakribi no la mete atividades arte marsiais ba iha futuru. Serimónia juramentu ne'e hala'o liu husi parade militar, diriji direktamente husi Primeiru Ministru Kay Rala Xanana Gusmão hanesan mos Ministru Defeza no Seguransa, Tersa, (13/1/2014).

Membru PNTL no F-FDTL ho total 288 maka halo juramentu husi eis membru PSHT hamutuk 145, eis membru IKS hamutuk 88 no eis membru KORK hamutuk 55.

Juramentu iha bandeira RDTL no bandeira instituisaun rua nian oin, hanesan juramentu ba povu no nasaun hodi ba oin sei la mete tan no sei kumpri lolos deit lei no hakruk ba estadu no konstituisaun.

Antes halo juramentu PM Xanana bolu eis membrus arte marsiais husi PNTL ho F-FDTL sira ididak nia naran, balu naran iha maibe la marka prezensa no balu marka prezensa maibe naran laiha.

Juramentu ne'e esforsu husi estadu liliu husi governu hanesan dalan diak no prezisa duni, maibe mos prezisa hametin regulamentu internal PNTL no F-FDTL.

PM Xanana dehan, ba oin maka membru sira ne'ebe mak halo juramentu tiha sei nafatin hala'o atividades arte marsiais sei hasai husi forsa no polisia.

*"Hau rona membru PNTL balun fasilita ita nia joven sira hodi hakat ba Kupang hodi halo juramentu ba bandeira merah putih nomos membru F-FDTL balun dehan ba joven sira katak lalika tauk ho sese deit ami backing iha kotuk. Ida ne'e hau la gosta ho ida ne'e maka ohin loron mai halo juramentu ne'e. Ba oin sei laiha tan arte marsiais iha PNTL no F-FDTL nia laran,"*dehan PM Xanana.

Ministru Defeza no Seguransa dehan, lalika lori organizasaun arte marsiais mai boot liu fali intereses instituisaun estadu.

Estadu la obriga sese deit atu tama PNTL no F-FDTL, maibe bainhira ema ida hakarak sai membru PNTL no F-FDTL tenke iha nasionalizmu no patriotism hodi defende povu ninia sasan no vida moris, laos tama PNTL no F-FDTL hodi buka deit osan maibe iha dever boot ba estadu no povu ida ne'e.

Tuir lolos tama iha grupo arte marsiais ne'e buat diak tebes maibe sala utiliza, maun alin komesa la rona malu, oan la tauk ona aman-inan no at liu ba halo juramentu iha Kupang, Indonézia iha bandeira merah putih depois fila mai halo violénsia iha Timor-Leste, estadu sei la permite ho ida ne'e.

Membru PNTL sira ne'ebe naran iha lista maibe la marka prezensa Komandu Jerál PNTL sei kontinua bolu hodi halo juramentu iha faze tuir mai.

Antes halo juramentu ne'e, bazei ba rezulusaun governu membru PNTL sira ne'ebe maka involve iha arte marsiais hasai farda arte marsiais hodi sunu, ne'ebe realiza iha Kuartel Jerál PNTL.

*"Ita hatene, membru PNTL ne'ebe involo iha arte marsiais ne'e hamutuk na'in 174, na'in 100 resin mak halo ona juramentu, membru sira ne'ebe seida'uj halo juramentu komandu sei tenta nafatin atu bolu sira ne'ebe seida'uk hodi mai halo juramentu,"*dehan Segundu Komandante Jeral Komisáriu Afonso de Jesus.

Komisáriu Afonso hatutan, hafoin halo juramentu mak membru hirak ne'e sei involve nafatin iha arte marsiais ho evidénsia ne'ebe forte mak sei la tolera tan, no tenke halo demisaun ba membru.

Serimónia ne'e assiste mos husi Xefe Estadu Maior F-FDTL, Major Jeneral Lere Anan Timur, Komandante Jerál PNTL, Komisáriu Dr. Longuinhos Monteiro, membru governu tomak, membru deputadus nomos nakloke ba públiku. Juramentu hanesan sei halo mos ba membru governu sira nomos ba funsionairu públiku liu husi munisípiu ida-idak.

OJE 2015 ba PNTL \$27 Milloens

“Ami husu ba Komandante Unidade, Departamentu, Seksaun no Komandante Munisipiu sira katak orsamentu ne’ebe aloka mai PNTL orsamentu ne’ebe kiik, tamba ne’e komandante ida-idak bainhira halo proposta ba kompras, tenke identifika planu prioridade tuir livru no montante orsamentu ne’ebe aprovalu no ikus liu halo relatóriu hodi garante efikas no transparansia.”

Superintendente Assistente Polísia, **Luis da Silva**
Xefe Departamentu Finansas no Orsamentu PNTL



Instituisaun Polísia Nasionál Timor-Leste (PNTL) la’os hatene deit oinsa servi no proteje comunidade no Nasaun Timor Leste, maibe PNTL mos hatene oinsa jere ninia orsamentu rasik bazeia ba despaixu ne’ebe Governu hato’o ba PNTL.

Oinsa jere Orsamentu Jerál Estadu (OJE) ne’ebe kada tinan aloka ba instituisaun PNTL, servisu ida ne’e la’os fasil ba polísia hotu-hotu hatene, maibe iha Departamentu ida ne’ebe responsavel ba planu no alokasaun ba orsamentu ne’e rasik mak Departamentu Finansas no Orsamentu.

Departamentu ida ne’e importante tebes iha instituisaun PNTL, tamba Departamentu ne’e mak sai xave ba servisu hotu-hotu ne’ebe PNTL hala’o, tamba maske iha planu ne’ebe barak no diak atu hala’o maibe laiha orsamentu sei labele ajuda ba servisu hirak ne’e hotu.

Ho nune’e, servisu ne’ebe Departamentu Finansas no Orsamentu hala’o durante ne’e mak prepara prosposta, foti osan, rai osan, distribuisaun orsamentu no halo relatóriu, pontu importante 5 ne’e mak Departamentu Finansas hala’o.

Kada tinan instituisaun PNTL mos prepara planu orsamentu hodi apresenta ba Governu no aprova iha Parlamentu Nasionál mak foin ezekeuta

orsamentu refere.

Entertantu iha tinan 2015 ne’e, Orsamentu Jerál Estadu (OJE) ne’ebe Parlamentu Nasionál aprova ba instituisaun PNTL hamutuk \$ 27,962,850.00, ne’ebe aloka ba parte 4 (hat) mak hanesan saláriu no vensimentu, bens no servisu, kapital menor, kapital dezvoltamentu.

Saláriu no vensimentu hamutuk \$ 13,393,000.00, bens no servisu hamutuk \$ 13,396,000.00, kapital menor \$ 1,033,850.00, no kapital dezvoltamentu \$ 140,000.00.

Orsamentu ne’e aprova bazeia ba planu ne’ebe PNTL apresenta, molok apresenta ba Governu, Komandante husi 13 Munisipiu no komandante Unidade, Departamentu no Seksaun sira hato’o ona planu mai Komando Jerál hodi halo submisaun orsamentu mak apresenta ba Governu.

Ezekusaun ba orsamentu jerál ne’e bazeia ba iha Dekretu Governu no.01/2015, loron 7 Janeirou artigu 5 kona ba avizu autorizasaun despeza, bainhira avizu fo sai ona mak Finansas PNTL hato’o proposta ba kompras ba Ministeriu Finansa.

“Atu halo ezekeusaun ba orsamentu ne’e, ita kumpri bazeia ba iha Dekretu Governu no.01/2015, loron 7 Janeirou artigu 5 kona ba avizu autorizasaun despeza, kuandu avizu ona, mak komandante ida-idak prepara sira nia proposta orsamentu tuir livru orsamentu ne’ebe aprova ona, sira hato’o ba Komandante Jerál, no Komandante Jerál hato’o ba komandante Administrasaun, no Komandante Administrasaun hato’o mai Finansas hodi formula CPV hodi apresenta ba iha Ministeriu Finansas,” espika Xefe Departamentu Finansas no Orsamentu, Superintendente Assistente Luis da Silva.

Planu orsamentu ne’ebe PNTL prepara molok aprova iha Parlamentu Nasionál hamutuk \$ 43.684.000,00 maibe ikus

mai Komisaun Revizaun Politika halo redusaun tun mai \$ 27,962,850.00.

“Tamba sa mak halo redusaun, tamba orsamentu PNTL prepara liu husi submisaun orsamentu apresenta ba Dirasaun Nasionál Orsamentu (DNO), no DNO apresenta ba Komisaun Revizaun Teknikal (KRT), no KRT avansa ba Komisaun Revizaun Politika, ikus liu mak Komisaun Revizaun Politika mak sei desidi hodi fo montante hira tuir Orsamentu Jerál Estadu nian,” afirma Superintendente Assistente Luis da Silva.

Kona ba atu halo konstrusaun ba edificiu foun Kuartel Jerál PNTL iha Caicoli-Dili, orsamentu ne’ebe aloka ba ida ne’e liu husi Fundu Infraestrutur ne’ebe Ajensia Dezenvolvimentu Nasionál (ADN) mak responsavel, tuir lolos konstrusaun ne’e hahú ona iha tinan 2014 maibe comunidade ne’ebe okupa rai iha área Caicoli ne’ebe atu harii edificiu foun ne’e seidak fo indiminizasaun, no indiminizasaun ne’e Ministeriu Justisa mak responsavel, tamba ne’e konstrusaun sei hala’o iha tinan 2015 ne’e.

Orsamentu ba konstrusaun edificiu foun kuartel jerál PNTL ne’e la prevé hamutuk iha orsamentu PNTL nian tamba konstrusaun ne’e kategoria kapital dezvoltamentu no orsamentu liu husi Fundu Infraestrutur no ADN mak sei toma konta.

Entertantu, komparaun orsamentu Jerál Estadu ba PNTL iha tinan 2014 no tinan 2015 laiha mudansa, orsamentu tinan kotuk hamutuk \$27,849,000.00 ba tinan ne’e iha \$ 27,962,850.00 miloens, aumenta deit cem mil, mudansa oitan deit labele responde ba servisu polísia nian hotu, tamba iha tinan 2015 ne’e aumenta membru polísia, ida ne’e signifika katak farda, saláriu, alimentasaun ba membru foun mos tenke aumenta, orsamentu ne’e la to’o, maibe Departamentu ne’e sei buka oinsa atu halo proposta orsamentu adisional hodi responde.

Estatístiku **Nasionál** **Insidente** no **Tránszitu** **2015**



Estatístiku **Insidente Nasionál** 2015

Distritu	Janeiru
Aileu	2
Ainaro	6
Baucau	7
Bobonaro	17
Cova Lima	16
Dili	120
Ermera	28
Lautem	4
Liquica	15
Manatuto	3
Manufahi	1
Oecusse	20
Viqueque	20
Totál	259

Estatístiku **Tránszitu Nasionál** 2015

Distritu	Asidente hotu-hotu	Vitima ne'ebé kanek	Asidente Fatál
	Janeiru	Janeiru	Janeiru
Aileu	8	7	1
Ainaro	4	3	0
Baucau	10	11	0
Bobonaro	4	7	0
Cova Lima	2	6	0
Dili	70	54	3
Ermera	4	6	0
Lautem	8	11	2
Liquica	11	26	0
Manatuto	2	1	0
Manufahi	2	8	0
Oecusse	1	0	0
Viqueque	2	4	0
Totál	132	144	6

Thomas Maia Rodrigues/PNTL

Ajente rekruta sira istika ain ho liman hodi lao ain husi postu Unidade Maritima Atabae
ba sentru treinamentu Rairobo ho distansia km 12

PNTL

iha asaun

Estevao Pereira/PNTL

Ajente rekruta



Thomas Maia Rodrigues/PNTL

Komandante Centru Formasaun ba Polísia Supt. Xefe Julio Hornai lao ain akompaña ajente rekruta sira ba tuir formasaun baziku iha Atabae-Rairobo



rekruta 2015 tuir treinamentu iha Rairobo-Atabae-Bobonaro



Estevao Pereira/PNTL

Lia nain Ira Bi'i kari fos ba karau nia leten antes atu oho hodi halo serimonia ritual tara bandu.

BOP iha Oeste atu hamenus krime

Jeremias dos Santos/PNTL

Unidade Especial Polisia (UEP) Sub-Unidade Batalhaun Ordem Pública (BOP) loke liras hodi hari'i Kompañia Delta BOP iha Postu Maliana, Munisípiu Bobonaro atu fo seguransa diak liutan ba iha futuro. Kompañia Delta BOP ne'e sei kobre munisípiu Bobonaro, Kova-lima no Oe-cusse.

Instalasaun Kompañia Delta BOP realiza iha tersa, (20/1) Soso, Postu, Maliana. Serimonia ne'e abertura husi Segundu Komandante Jerál PNTL, Komisáriu Afonso de Jesus ne'ebe akompanha husi Komandante Munisípiu PNTL Bobonaro Superintende Xefe Hermenegildo G. da Cruz, Administrador Munisípiu Bobonaro Domingos Martins, Administrador Postu Maliana Adelino Brito no Xefe suku husi suku 6 ne'ebe ejisti iha Postu Administrativu Maliana.

Liu husi diskursu Segundu Komandante Jerál PNTL, Komisáriu Afonso de Jesus fo agradese ba Administrador Munisípiu ho Dirasaun Teras Propriedade ne'ebe fo fatin iha Soso ne'e hodi hari'i Kompañia Delta BOP, prezensa ne'e hola parte kontinuasaun dezenvolvimentu instituisaun PNTL hodi servi povu no nasaun Timor-Leste.

"Ita sira maka hala'o kna'ar polisia, maske formasaun ho espesialidade la hanesan, unidade oin-oin maibe ita ne'e Polisia Nasionál Timor-Leste ne'ebe ho misaun ida deit hodi

defende legalidade demokratiku iha nasaun ne'e," dehan Komisáriu Afonso.

Segundu Komandante Jerál PNTL husu ba unidade sira mak hala'o funsaun iha Munisípiu Bobonaro presiza iha koordinasaun diak ho Komandu PNTL Munisípiu Bobonaro, tuir área juridiku. Agora dadaun Sub-Unidade BOP Alfa iha Dili, Bravo iha Baucau no Delta iha Bobonaro Komandante PNTL Munisípiu Bobonaro Superintende Xefe Hermenegildo G. da Cruz hatete, bazeia ba planu governu nian hodi hari'i munisípiu no programa dezvoltamentu sei dezentralizasaun, Komandu PNTL mos ajusta hodi kompleta BOP nia ejistensia hodi nun'e mak BOP monta Kompañia Delta iha Bobonaro.

Kompañia BOP ida ne'e sei responde situasaun seguransa ne'ebe emerjensia ba iha Munisípiu Bobonaro, Kova-lima nomos munisípiu Oe-cusse. Polisia hanesan ajensia ba mantein seguransa no promove pás, estabilidade ba moris hakmatek povu nian.

"Ohin ita mai para atu realiza kompañia BOP Delta. Kompañia ida ne'e hamrik ho nia objetivu premeiru fo apoiu ba Komandu PNTL Munisípiu Bobonaro hodi asegura lei no orden hahu husi sidade Maliana to'o ba área rurais inklui postu administrativu 6 kompostu husi postu Bobonaro, Cailaco, Lolotoe, Balibo no Atabae nomos to'o ba área

fronteiras, kompañia BOP nia prezensa hodi atende situasaun emerjensia." Supt. Xefe Hermenegildo esplika.

Hari'i kompañia BOP iha ne'e tamba esforsu masimu husi Komandu Munisípiu Bobonaro no Administrasaun Munisípiu Bobonaro hodi husu Komandu PNTL nian, ne'ebe mak ohin realiza duni hari'i kompañia BOP iha Bobonaro ne'e.

Administrador Munisípiu Bobonaro, Domingos Martins iha nia palestra hatete, *"hau agradese tebes ba Komandu PNTL iha vontade no fo atensaun ba seguransa hodi ohin realiza prezensa Kompañia Delta BOP iha Bobonaro atu bele servi ita nia comunidade."*

Munisípiu Bobonaro iha suku 50, aldeia iha 193 ne'ebe baliza ho nasaun Indonézia. Munisípiu Bobonaro PNTL kompostu husi Komandu Munisípiu, UPF, Marítima ho Migrasaun aldende ne'e mo ho prezensa F-FDTL ne'ebe monta ninia postu iha Tunubibi.

Liu husi oportunidade ne'e Administrador Munisípiu husu ba entidade hotu-hotu no povu tomak iha Bobonaro atu fo apoiu kna'ar BOP nian hodi nune'e asegura diak liutan seguransa iha futuro.

Kompañia BOP nia prezensa iha Munisípiu Bobonaro hodi fo apoiu mos ba intereses nasional estadu RDTL nian hodi tulun dezvoltamentu mega projetu petroleo Suai Supplay Base.

KJ transfere membru PNTL

Antes Komandante Jerál Komisáriu Dr. Longuinhos Monteiro simu pasta foun hanesan Ministru Interior halo transferensia membru sira. Objetivu transferensia ba membru no Komandante sira hodi hala'o kna'ar ho diák liutan iha idak-idak nia responsabilidade.

Ordem transferensia Oficiais Superior:

No	Postu	Naran	Husi	Muda ba
1.	Sup	Natércia E.S.Martins	Komd. Mun Liquiça	Komd. Interino Operasaun Nasionál
2.	Sup	Justino Menezes	Komd. Mun Viqueque	Komd. Mun Baucau
3.	Sup. Xefe	Armando Monteiro	Komd. Oper Nasionál	Komd. Mun Bobonaro
4.	Sup. Xefe	Jose Maria Neto Mok	Komd. Munisípiu Baucau	Xefe Servisu Informasaun Polisia (SIP)
5.	Sup	Eugénio Ferreira	Xefe Interino (SIP)	Komd. Mun Covalima
6.	Sup	Olavo Cristovão	Gab. Komd Oper.Nasional	Komad. Mun Liquiça
7.	Sup	Antonino Mauluta	Komd. Mun Covalima	Komd. Mun Viqueque
8.	Supt. Asst.	António Rego Fernandes	2º Komd. Mun Lautem	2º Komd. Mun Aileu
9.	Supt.Asst.	Sebastião Alves Quintão	2º Komd. Mun Aileu	2º Komd. Mun Lautem
10	Supt.Asst.	Euclides Belo	Komd. COE	2º Komd. Mun Dili
11.	Insp. Xefe	Apolinario Purificação	Adjunto Komd. COE	Komd Oper Espesiál-COE
12.	Insp.	Joni Barbosa		2º Komd. Komp Oper Espesiál-UEP.
13.	Insp. Asst.	Gonçalo Antonio Pinheiro		Komd Komp Oper Espesiál-UEP
14.	Insp.Xefe	Hermínio de Jesus		Xefe Aprovisionamentu Komandu PNTL
15	Supt. Asst.	Lucas Tilman	2º Komd. Mun Ermera	Xefe Adm Plan Komandu PNTL
16.	Supt. Asst.	Raimundu de Araujo	Gab. Komd Oper.Nasional	2º Komd. Mun Ermera

Ordem transferensia pesoal:

No	Postu	Naran	Husi	Muda ba
1.	Supt. Asst.	Moises Amaral		Sek.CPLP asuntu estadu Seguransa
2.	Insp. Xefe	Jose Maria Boavida	Komd Esk.Postu Adm Laga-Baucau	Xefe dep.adm.plan.Kom.PNTL
3.	Insp. Xefe	Carlito da Silva Adori	Centru Formasaun Polisia	Gab.Kor.Kop.Relasaun Int.Kom.PNTL
4.	Insp. Xefe	Delfin da Silva	Gab Apoiu Komd. Oper	Xefe Sek.Oper.Info. Mun.Aileu
5.	Insp. Xefe	Helio da C.de Deus	Xefe Sek.O.I Komd. PNTL Mun. Aileu	Xefe Sek.O.I Komd. PNTL Mun. Bobonaro
6.	Inspetór	Mariano M. Soares	Gabinete apoiu Komd.Oper	Centru Formasaun Polisia
7.	Inspetór	Carlos P. Cabral	Komandante Kompañia A-BOP	Xefe.sek.Oper.Info.UEP
8.	Inspetór	Mauclau M. Guterres	Komd. Esk. Postu Adm Venilale-Baucau	Komd. Esk. Postu Adm Baucau
9.	Inspetór	Cesaltina Soares	Dep. Lojistika	Centru Formasaun Polisia
10	Insp. Asst.	Justino d.C. Fernandes	Komd. Esk Postu Adm-Baucau	Komd. Esk Postu Adm-Quelicaí
11.	Insp. Asst.	Marcelino Fraga	Kompañia B-BOP	Kompañia A-BOP
12.	Insp.Asst.	Cosme d.S. Ximenes	Komd. Esk Postu Adm Laga-Baucau	Komd. Esk Postu Adm Venilale-Baucau
13.	Sarj. Xefe	Américo F. da Costa	Komd. Esk Postu Adm Quelicaí-Baucau	Komd Interino Komp B-BOP
14.	Sarjentu	Duarte Belo Ximenes	Husi Unidade Espesiál Polisia (UEP)	Komd. Esk Postu Adm Laga-Baucau



UPM garante estabilidade no kontrólu masimu riku soim iha tasi

Unidade Polísia Marítima (UPM) nu'udar unidade iha POLÍSIA NASIONAL TIMOR-LESTE (PNTL) nian mahon. UPM hala'o ninia kna'ar tuir artigu 32 Dekretu-Lei no. 9/2009, lorón 18, fulan-Fevereiru (Lei orgánika PNTL). Har'i UPM sai forsa ida ho abildade no podér espesializadu ho sistema Autoridade Marítima nian no estabelese espesifikamente atu fornese vijilánsia no monitor área tasi-ibun no domínio públiku Marítima.

Polísia Marítima presiza matenek no abildade espesializadu, atu bele fo seguransa ba públiku, membru PNTL sira ne'ebé hola parte iha seguransa, seguransa públiku no ezekusaun lei iha tasi territoriál Timor-Leste nian presiza hatudu nivel ne'ebé aas kona-ba prófisionalizmu no kompeténsia.

Komandante Unidade Polísia Marítima PNTL mak sei mantein ligasaun ho Komandante Sentru Formasaun Polísia nian atu, identifika eziyéncia formasaun espesializadu ba pesoál ne'ebé iha ninia komandu okos, estabelese parseria servisu ho Ajénsia nacional e internacional nebe iha Timor Leste, no hetan apoiu bilateral husi embaixada EUA, Korea, Australia no Indonézia, nomos servisu hamutuk ho liña ministerial sira hanesan ho MDS F-FDTL, Peska, migrasaun, Alfandega, Karantina no Autoridade porto.

UPM hari'i iha 2001 ho elementus nain 7 deit, menus fasilidade no menus tebes ba iha área formasaun no treinamentu. Iha tinan 2002 to 2010 pessoal UPM total hamutuk 45 pessoas.

Iha 2010 ofisiais Polísia Nasionál Timor-Leste (PNTL), Superintende Lino da Silva Saldanha sente orgulhu bainhira Komandu PNTL liu husi Komisáriu Dr. Longuinhos Monteiró fo konfiansa hodi nomeia Superintende refere nudar Komandante ba Unidade Polísia Marítima (UPM).

Superintendente refere hakarak tebes apróveita oportunidade ne'e hodi kontribui ba desenvolvimentu PNTL, tamba hanesan ofisiais hasoru ona esperensia barak iha ninia pasadu no agora hakiduk pasu ida mai kotuk hodi intróspeksi ba ninia-an hodi hakarak hakat ba oin ho ninia vizau nebe positivu hakarak PNTL sai hanesan instituisaun ida nebe prófisional hodi servi ninia povu, hadomi ninia povu no hatudu dalan ba ninia povu atu moris iha paz no tranquilidade, hatur lei e ordem tau interesse públiku no interesse nasional as liu interesse hotu-hotu.

Iha 2012 hahu halo planu hodi identifika prioridades saida deit nebe sai prioridades no urjente ba UPM hodi lao, maske neneik hakat ba oin ho elementus hamutuk 117 pessoas agora koloka hotu ona, ba iha área importante 4 servisu UPM nian maka hanesan: servisu iha kuartel UPM, servisu iha Postu UPM iha 11 munisípiu, servisu iha Ró (NRTL) Navio Republika Timor-Leste no servisu fo seguransa ba instalasaun porto portao de entrada.

Servisu importante seluk nebe UPM halao tuir kna'ar UPM nian tuir artigu 32 maka fo atensaun ba iha salvamento Marítima, prótesaun ambiental no kontróla atividade kontra

bandu iha área marítima Timor-Leste tomak, hahu husi liña kosteira 12milhas, no zona kontigu 24 milhas.

Kona ba zona economic exclusive 200 milhas to ba iha zona plataforma, UPM so halao observasaun no hametin liña de koordenaun ho parte hotu-hotu nebe maka uza tasi hanesan meius transporte ba sira nia atividade embarka e desembarca ba navio.

Iha 2015 haree buat barak maka iha, hirak ne'e hanesan mehi ne'ebe bainhira simu kna'ar ne'ebe realiza duni. Hahu husi 2001 to'o mai 2010 situasaun zeró maibe agora iha 2015 bele hare ho matan no sente rasik katak, unidade ida ne'ebe ninia nivel hanesan ho unidade sira seluk ne'ebe Komandu Jerál mos fo atensaun ba.

UPM laos tur deit muda nia-an, maibe tamba ho fiar no konfiansa ne'ebe Komandu fo fiar ba lideransa UPM ne'ebe mos servisu hamutuk ho membrus sira. Bele dehan katak iha 80 % atinji ona objetivu UPM ninian. Alende ne'e mos apróvasaun orsamentu aumenta membrus sae ba 140 elementos, ne'ebe sei realiza iha Novembru tinan ida ne'e.

Sei aumenta to 140 elementos no tuir planu prioridades ne'ebe sai importante ba UPM maka hanesan : continua aumenta elementos efektivu UPM husi número 140 elementus to hetan 350 elementos efektivu ba UPM no destaka ba iha 15 postu iha área kosteira Timor-Leste.

Iha tinan ne'e Komandante UPM esforsu hodi prepara ona planu 2015 to 2020 maka hanesan aumenta

númeru elementos UPM hodi atinji objektivu seguransa kontróla área kosteira Timor-Leste, tuir planu destaka tiha ona, postu UPM permanente 7 iha área kosteira, maka hanesan postu Sional Dili, postu portu de Dili, postu Atauró, postu porto de Tibar, postu treinamentu Atabae, postu Batugade, postu Suai loró, postu porto Com lospalos, tótal elementus efektivu 117 maka fahe ona ba iha postu 7, kuartel UPM ho ró NRTL.

Presija aumenta tan númeru elementus 233 efektivus hodi destaka ba iha postu 8 maka hanesan postu porto Oe-cusse, postu Betano Same, postu beassu Víkeke, postu lore Lautem, postu Seisal Baucau, postu be Heda Manatuto, postu Akrema atauró no postu Laivai.

Atividades ilegál tolu maka sempre UPM hasoru dadaun maka hanesan kontrólu ema tama ilegál ho peska ilegál, halao kontrólu ba prótesaun ambiental, halo salvamento marítima no kontrólu ba iha krime organizadu nebe maka halao iha tasi.

Haree saida mak mudansa iha UPM ne'e tamba hetan apoiu maximu husi Embaixada Estado Unidos Amerika (EUA) iha Timor-Leste, valor orsamentu 1 Milloens dolar Amerikanu nebe apoiu hodi fo treinamentu no material ba treinamentu nian nomos halo konstrusaun ho montante \$ 270.000,00 mil dólar hodi halo konstrusaun Zety/ ponte kais nomos fo treinamentu ba membru UPM ne'ebe prepara husi National Crime Investigation Service (NCIS) iha NAVY-EUA nia mahon.

Treinamentu ne'e to'o ohin lorón sei nafatin kontinua tanba bazeia ba MOU nebe maka halo husi SES ho Embaixada EUA iha Timor-Leste. Hodi define kedas prioridades de formasun prepara kurriulu, ekipamentu e fatin treinamntu iha rai laran nomos iha rai liur.

NCIS ninia papel importante tebes mai Timor-Leste espesial ba UPM tanba husi NCIS ninia prógrama iha membru UPM tuir treinamentu iha EUA no Australia iha 2014 nia laran, apoiu ekipamentus radio komunikaun no life jacet nomos organiza treinamentu conjunta entre Polísia Marítima ho Naval (F-FDTL)

Espera iha tinan ida ne'e (2015), liu husi koneksaun ba iha Embaixada EUA ho Embaixadora foun nafatin hakarak apoiu ba UPM tuir nesiedade unidade ne'e ninian tamba liu husi politika EUA área marítima tenke fo atensaun hodi kontróla krime organizadu, no kria paz e establidade iha rejiaun Ázia no liga

ba politika Timor-Leste hanesan pais soberania hodi kontrólu ró ilegál sira ne'ebe sempre tama mai naok riku soin ita nian iha tasi laran.

Trainementu premeiru bazeia ba lei UNCLOS nebe define papel importante ba autoridade sira hotu nebe servisu iha ligasaun ho tasi atu koopera ba malu ho diak. Papel importante 3 nebe autoridade hotu bele servisu tuir ida-idak nia kompetensia, maka hanesan servisu nebe tenki halo husi autoridade estado bandeira sira maka iha responsabel tomak atu assume sira nia kna'ar hanesan estado bandeira.

Alende ne'e mos treinamentu oinsa kontrólu kontentor sira ne'ebe tama sai iha Portu Dili, atu nune'e bele detekta sasan sira iha kontentor laran atu nune'e bele livre husi atividades krime no ilegál. Iha treinamentu barak membru UPM sira halao tiha ona maka hanesan, oinsa servisu hamutuk ho autoridades sivil kona-ba seguransa tama sai no kontróla kontentor, responde emergensia, halo inspeksaun ba iha ró, operasaun simulasi hodi foti sai vitima nebe hetan ameasa iha ró laran, halo abordajen ho ró, halo salvamentu marítima no prótesaun ba ambiental iha tasi laran.

Konstruksaun kuartel UPM inklui parajen ró UPM ne'e hala'o iha fulan Agostu tinan 2012 husi Kompania Lelo Construction Unipessoal Lda, ho total orsamentu \$ 150.000,00 mil dólar América, ne'ebé kompostu husi konstrusaun ba edifisiu UPM gasta osan \$ 100.000,00 mil dólar, no parajem ró (barco) gasta osan \$ 45.000,00 mil dólar américa. Liu husi intervensaun diretamente husi eis Primeiru Ministru Kay Rala Xanana Gusmão ho orsamentu husi ADN hodi hari'i moru ne'ebe haleu iha kuartel UPM.

UPM iha planu hodi conjunta ho planu estratéjiku Komandu PNTL ninian ho modelu VIP (Vizibilidade, Involvimentu no Prófesionalizmu). maibe tuir plano estrategico UPM tinan 2013 to 2015 .

UPM identifica ona planu estratéjiku 8 maka sai hanesan importante hodi desenvolve UPM iha futuru mai maka hanesan;

1). Kontinua halao formasaun no kapasitasaun ba membrus UPM iha nivel baziku, mediu no intermediu hodi halo balansu tuir prósesu desenvolvimentu nasaun Timor-Leste.

2). Aumenta númeru efektivu UPM husi 117 pessoas to 350 membrus efetivu UPM hodi koloka ba iha kuartel unidade, postu UPM, ró NRTL no fo kontróla instalasaun porto.

3). Estabelese jestaun nebe diak hodi eleba bem estar ba ofisias no membrus UPM nian.

4). Estabelese jestaun kontrólu ba atividades lorlorón, semana-semana, fulfulan no tinan.

5). Estabelese SOP ba siklu OPS, UPM

6). Konstrusaun ba kuartel foun UPM iha Dili tama ona fase 60% sei kontinua konstrusaun tan pisina ho aula treinamentu ho aula ekontru.

7). Sei koloka ró lancha Vizilansia interception (LVI) 1 ba iha kada posto hodi reforsa atividade OPS iha tasi nomos próposta ba iha Komandu Jerál PNTL hodi koloka orsamentu manutensaun hodi halo reparasaun ba ró (LVI) 14 nebe kondisaun at hela.

8). Konstrusaun postu 15 UPM iha área kosteira Timor-Leste hodi reforsa atividade OPS iha tasi no bele kontrólu tasi Timor-Leste, presiza tebes kontinuaun treinamentu ba membru UPM hanesan komandante iha nivel ró, komandante iha nivel postu.

Membru UPM tomak hatene lori ró hanesan kapitaun maibe sertifikadu karta de kondusaun lori ró nian seidauk iha, ba oin presiza tebes iha formasaun especialidade ba membrus refere kona ba lori ró atu nune'e bele hetan sertifikadu standar internasionál.

Formasaun hodi hetan sertifikadu ba navegasaun presija tinan 3-4 bele halo iha Akademi Ilmu Perkapalan Indonesia(AIP), Surabaya Indonesia. Treinamento refere presija tebes tulun no atensaun husi Komandu .

Hato O nia Komitmento

Saida mak o bele halo ba.....

O nia an.....

O nia Servisu.....

PNTL.....

UPM.....

No ba O nasaun RDTL.....

Halo o nia servisu ho

DIAK, BADINAS, DISIPLINA, RESPONSABILIDADE, ATIVU, PRÓ ATIVU NO INOVATIVO

AMI UPM ORGULLU SERVISU IHA TASI.

OBRIGADU.....!!!

Superintendente **Lino Da Saldanha**

Komandante Unidade Polísia Marítima



PK organiza tara bandu hodi hamenus krime

“Komandu PNTL Munisípiu Vikeke liu husi kna’ar Polísiamentu Komunitária (PK) organiza tara bandu iha suku Ira bi’i Postu Administrativu Uatucarbau hodi hamenus konfliktu, hamatak ambiente no tau ás respeito malu comunidade sira maka hela iha baliza entre Postu Administrativu Uatucarbau, Baguia no Iliomar.”

Superintendente **Justinho Menezes**
Komandante PNTL Munisípiu Vikeke

Serimonia tara bandu ne’e organiza husi programa Polísiamentu Komunitária, ne’ebe kompostu husi KPK (Konsellu Polísiamentu Komunitária) ne’ebe involve Xefe Suku, Oficial Polísia Suku (OPS), Administrador Postu Uatucarbau, Komandante PNTL eskuadra Postu Uatucarbau hamutuk ho lia nain sira.

Superintende Justinho hatutan, programa tara bandu ne’e iniciativa husi programa Polísiamentu Komunitária ne’ebe iha suku Ira bi’i forma ona KPK (Konsellu Polísiamentu Komunitária).

Antes tara bandu problema sempre mosu, problema rai, animal estraga ai horis, tá ai no sunu rai no hadau malu baliza. Problema hirak ne’e tamba laiha disiplina no respeito ididak nia direitu ho ida ne’e maka KPK halo relatoriu ba KDD (Konsellu Diretiva Distrital) hodi foti kokluzaun katak, presiza duni tara bandu iha suku Ira bi’i hanesan meus importante hamenus krime sira.

“Hau fiar ho tara bandu ita nia comunidade sei respeito malu no kuidadu ita nia ai horis sira, nune’e mos dalan ida ne’e hamenus problema iha suku laran,” dehan Supt Justinho.

Apoiu tara bandu mai husi Komandu PNTL Munisípiu Vikeke ne’ebe halo proposta ba parseira Timor-Leste Cooperation Community Police (TLCCP) Nova Zelandia nomos hetan apoiu husi Sekretaria Estado Maiu Ambiente.

Kona-ba fo seguransa no estabilidade ba comunidade Komandu PNTL Munisípiu Vikeke uza maneiras oin tolu. Premiru, bainhira iha mosu problema PNTL sempre to’o kedan iha fatin akontesementu atu tuir regra husi komandu, segundu bainhira orden husi Komandu ou husi governu liu husi rezolusaun ba problema ruma sempre uza maneira aprosimasaun la presiza uza forsa no terseiru maka atividades rutina halo pasa rabista, patrullamentu, vizita ba suku-suku no dialogu ho comunidade sira ne’ebe tama iha programa Polísiamentu Komunitária.

Iha 2014 totál kazu kriminál hamutuk 198, kazu asaltu

normal mak maioria iha 76 no tuir mai mak kazu violénsia doméstika ho total 66 no kazu sira seluk, kompara kazu iha 2013 kazu hamutuk 235, signifika kazu komesa menus.

“Numeru kazu komesa tun tanba liu husi planu estratéjia nebe Komandu PNTL trasa ne’ebe ho programa Polísiamentu Komunitária.” Supt Justinho informa.

Iha 2014 implementa atividades Polísiamentu Komunitária hodi forma KDD (Konsellu Diretiva Distrital) kompostu husi Prezidenti Administrador Munisípiu ou Komandante PNTL Munisípiu ho ninia membrus Administrador Postu, Komandante Squadra, Representante Igreja, Veteranus, Sociedade Sivil nomos emprezariu sira.

Iha suku hodi hari’i estrutura ho naran KPK (Konsellu Polísiamentu Komunitária) kompostu husi Xefe Suku, OPS ho ninia membru Xefe Aldeia, representante veteranus, lia nain no juventude iha konsellu suku.

Kna’ar KPK premeiru identifica problemas, rezolve problemas no kria prosidementu hodi hala’o atividades iha suku, hanesan ohin realiza tara bandu, ida ne’e programa Polísiamentu Komunitária.

“Ho estratéjia hirak ne’e mak iha 2014 kazu ninia numeru komesa tun, ita espera iha tinan ida ne’e sei tun tan tanba ita nia orgaun Polísiamentu Komunitária funsiona ho diak,” komenta Supt. Justinho.

Munisípiu Vikeke iha suku 35, Postu Administrativu iha 5 no Aldeia iha 234. OPS kolokadu hotu ona ba suku 35, maske iha dezafiu no difikuldades ne’ebe OPS sira infrenta maka hanesan transporte no rádio komunikaun no lojistika.

Husi totál suku 35 ne’ebe OPS monta ba iha OPS 10 mak foin hetan transporte motorizada, iha suku balun estrada laiha susar tebes ba OPS atu utiliza transporte hodi hala’o kna’ar, maibe ho dizafiu no difikuldades ne’e la sai impkatu hanesan polísia hodi mantein hala’o kna’ar no ba futuro Komandu PNTL sei bele kompleta no atende difikuldades hirak ne’e.

PNTL IHA Viqueque

Membru Komandu PNTL Munisipiu Viqueque

DEVIZA	FETO	MANE	TOTÁL
Superintendente Xefe			
Superintendente		1	1
Superintendente Assistente		1	1
Inspetór Xefe		1	1
Inspetór		3	3
Inspetór Assistente		1	1
Sarjentu Xefe	1	6	7
Primeiru Sarjentu	1	2	3
Sarjentu	6	18	24
Ajente Xefe	14	51	65
Ajente Prinsipal	3	23	26
Ajente	1	4	5
TOTAL	26	111	137

LEI NO ORDEN





BOP Bobonaro prontu **kualker** **tempu**

Polísia prontu destaka iha fatin ne'ebe deit tuir orientasaun Komandu Polísia Nasionál Timor-Leste. Ida ne'e mak Komandante Kompañia Delta BOP Insetór Rui de Araujo Freitas simu oden husi Komandu Unidade Polísia Espesiál (UEP) hodi komanda Kompañia Delta BOP iha Munisípiu Bobonaro ne'ebe foin hari'i.

Insetór Rui de Araujo Freitas membru polísia ne'ebe iha esperensia masimu iha área unidade espesial nian.

Tuir lei ne'ebe mak fo ba iha Unidade Espesiál Polísia (UEP) liliu ba iha Sub-Unidade BOP ne'ebe destaka iha Munisípiu Bobonaro monta iha Maliana-Soso ho nia misaun atu fo apoiu Komandu PNTL Munisípiu Bobonaro hodi atende situasaun emerjénsia ne'ebe presiza tebes intervensaun Kompañia Delta BOP.

"Hau sei servisu hamutuk no iha

liña koordinasaun ho Komandu PNTL Munisípiu Bobonaro ho mos autoridades lokal atu nune'e bele asegura situasaun bainhira mosu problema ne'ebe presiza BOP nia apoiu," informa Komandante Kompañia Delta BOP.

Komandante ne'e hatutan, premeiru funsaun maka sei hamutuk ho Komandu PNTL Munisípiu Bobonaro halo koordinasaun ho Administrador Munisípiu, Administrador Postu, suku no aldeia sira atu tun ba área rurais sira hodi informa kona-ba kna'ar no funsaun BOP ninia, atu nune'e comunidade sira bele hatene BOP prezensa iha sira nia le'et.

"Hau sente laos ema foun BOP, maibe hanesan Komandante ba Kompañia Delta iha Munisípiu Bobonaro hanesan ema foun, hau sente lori kna'ar ne todan, maibe ho konfiansa

Estadu no Komandu PNTL fo fiar hanesan polísia prontu iha kualker tempu. Hau pronto atu servisu, pronto proteze povu ne'ebe presiza moris hakmatek," presta Insp. Rui Freitas.

Tuir despaisu husi Komandu UEP, iha tempu badak Kompañia Delta BOP sei loke tan pelotaun ida iha Maliana, Kova-lima no Oe-cusse. Kompañia Delta BOP Munisípiu Bobonaro ho total membru foin maka 40, tamba membru iha Sub-Unidade BOP ema menus hodi hein ajente rekruta foun ne'ebe maka oras ne'e dadauk tuir formasaun iha Rairobo.

Tuir Komandante BOP Bobonaro katak, membrus seidauk sufsiente hodi hala'o kna'ar no funsaun ba kontrola seguransa. *"Ami presiza aumenta tan membru BOP tamba ami nia área operasaun luan teb-tebes."*

PM husu PNTL tenke “rigór no firmeza”

Primейru Ministru RDTL ba VI Governu Konstitusional Dr. Rui Maria de Araujo husu ba Instituisaun Polisia Nasional Timor Leste (PNTL) tenke rigor no firmeza katak tenke halo lolos ba buat ne'ebe loos, no karik ita loos dehan loos, no karik sala dehan sala.

Liafuan xave importante rua ne'e mak hato'o husi Dr. Rui Araujo bainhira hetan konvite husi Komandu Jeral PNTL hodi hala'o enkontru ho Komandante Jeral Interino Komisariu Afonso de Jesus, Ministru Interior Dr. Longuinhos Monteiro, ho ofisiais superior sira iha aula konferensia kuartel jeral PNTL, Caicoli Dili, sesta 20 Fevereru 2015.

“Ha'u apela ba Komando PNTL nomos Ofisiais Superior sira hotu atu fo atensaun maka'as ba disiplina, no kaer metin ba liafuan rua ne'ebe durante ne'e ha'u temi bebeik mak “rigór no firmeza”, rigor katak halo lolos buat ne'ebe loos, firmeza katak ita loos dehan loos, ita sala dehan sala, kuandu ita sala labele tauk atu husu diskulpa,” apela PM Rui Araujo.

Iha enkontru ne'e mos PM husu ba PNTL atu tau prioridade ba polisiamentu komunitaria, tranzitu nomos kontrola ba trafiku droga, no trafiku umanu.

“Aproveita oportunidade ida ne'e, husu ba PNTL durante tinan hirak oin mai atu fo importansia ka fo prioridade maka'as liu tan ba polisiamentu komunitaria atu nune'e aumenta persepsaun estabilidade iha comunidade nia leet, nomos fo prioridade ba tranzitu liu-liu iha sidade Dili ne'ebe sai mos hanesan fonte de potencial dezordem, se ita la'o iha estrada ita bele nota motorizadas, karreta lao barak teb-tebes, balun lao laiha ordem, hanesan karta kondusaun no laiha dokumentus, nomos kontrola ba trafiku droga, trafiku umanu imigrasaun ne'ebe loos, espera durante tinan hirak mai bele marka diferensia ida,” akresenta PM VI Governu ne'e.

Iha oportunidade ne'e, PM mos agradese ba servisu PNTL hotu ne'ebe durante ne'e halo ona, hanesan polisiamentu komunitaria nian, operasaun balun ne'ebe durante ne'e hala'o hahu husi tinan 2010 to'o agora atu mantein estabilidade no ordem iha ita nia rain, servisu ne'ebe PNTL halo hamutuk ho nasaun CPLP, nomos iha área seluk.

Entertantu iha enkontru ne'e, Komandante Jeral PNTL Interinu Komisariu Afonso de Jesus halo apresentasaun kona ba kondisaun atual PNTL nian, dadus statistiku nasional, no planu estratejiku ba oin.

Primeiru Ministru ba VI Governu Konstitusional Dr. Rui Maria de Araujo hala'o vizita ba Kuartel Jerál PNTL Caicoli-Dili, (20/2/2015).

Foto: Thomas Maia Rodrigues/PNTL



Ministru Interiór fo nafatin **Atensaun** ba **PNTL**



Liu husi desizaun politika, Komandante Jerál Komisáriu Dr. Longuinhos Monteiro asumi kna'ar foun nudar Ministru Interiór iha VI governu Konstitusional, ne'ebe maka simu tomada de posse iha loron 16 Fevereriu 2015 liuba iha salaun da Nobre Lahane.

Liu husi Serimonia despedida no agradesimentu husi Komandu PNTL ho Ministru Interiór hala'o iha salaun Sentru Formasaun Polísia Sabadu, (21/2/2015), Ministru Interior Dr. Longuinhos hatete, ho laran todan husik fatin ne'ebe servisu ba durante tinan lima nia laran, tamba intereses nasaun ninian tenke husik hela insituisaun PNTL hodi simu kargu foun, maibe kargu foun ne'e iha kna'ar politika hodi kontinua fo atensaun ba PNTL.

"Hau lori pesoal no familia nia naran hau hato'o hau nia agradesimentu ba Komandante Jerál Interino ho ofisiais sira hotu ne'ebe maka reprezenta familia boot PNTL husi nasional to'o nivel munisípiu nomos agradesimentu ba parseiru sira hotu ne'ebe mos marka prezensa iha kalan konfranetizasaun," dehan Ministru Dr. Longuinhos.

Ministru iha VI governu Konstitusional ne'e hatutan, serimonia Komandu PNTL halo mai ne'e laos despedida, maibe ne'e somente sinal ida atu hametin liutran lasu amizade,

fraternidade nomos ligasaun servisu nudar pesoal nomos professional ninian iha ididak nia área.

"Laos fasil husik hela instituisaun ida ne'ebe hau servisu iha tinan lima nia laran hanesan Polísia Nasionál Timor-Leste i momentu de otru tenke hakat sai, husik hau nia farda, husik sasan operasaun hanesan polísia ninian, dader-dader hau sempre tara hau nia farda iha odamatan kotuk, hau sempre hare no hau hanoin farda ne'ebe durante tinan lima nia laran hau uza. Hau nia oan protesta hau dehan "papa ba kantor tau fali jas nee hare la jeitu liu, ne'ebe hau dehan ba hau nia oan, laos o maka dehan hanesan nee, ema barak mos dehan hanesan nee," presta Ministru Dr. Longuinhos ho sentimentu tristi.

Iha kalan serimónia agradesimentu ne'e grupo Munisípiu Liquiça, kanta marsa PNTL ne'êbe ninia lirik Ministru Interior Dr. Longuinhos ho eis Komandante Superintendente Natercia E. Martins maka hakerek.

"Hau hanesan Ministru Interior ohin kalan ne'e hau aprova hodi hatete, ba oin PNTL ninia marsa maka ohin kalan ita rona hamutuk ne'e, marsa ne'e sei hahu kanta iha serimonia komemorasaun loron PNTL ba dala 15 no tomada da posse ba Komandante Jerál foun ne'ebe maka sei mosu mai," dehan Ministru Dr. Longuinhos.

Iha fatin hanesan Komandante Jerál Interino Komissáriu Afonso de Jesus dehan, lori Komandu PNTL iha biban ne'e hato'o agradesimentu ba Ministru Dr. Longuinhos nia lideransa iha tinan lima ba kotuk hanesan Komandante Jerál PNTL ne'ebe tau obra barak hodi alkansa objetivu PNTL hanesan polísia ne'ebe hetan fiar husi comunidade no hasae kualidade profesionalizmu polísiamentu ninian.

"Hau lori Komandu PNTL nia naran no membru sira tomak nia naran, see iha ita (Dr. Longuinhos) nia lideransa keta mosu naksalak ruma, hanesan ema la perfeito husu deskulpa ho hakraik-an," dehan Komisáriu Afonso de Jesus.

Iha okaziaun ne'e Komisáriu Afonso husu nafatin Ministru Interior ninia apoiu no tulun ba instituisaun PNTL ne'ebe hamahan mos iha Ministerio Interior, tamba Ministru Interior hatene difikuldades saida mak PNTL ohin ba futuru.

Depois jantar konfratenizasaun, Eis Komandante Jerál ne'e mos fahe lembransa ba Ofisiais Superior no Komandante Munisípiu sira, alende ne'e mos kada Komandante entrega lembransa agradesimentu hodi tara tais ba Ministru Interior.

Partisipante iha serimonia ne'e maka hanesan Ministru Defeza Cirílio Cristovão, Komandante Jerál Interino Komisáriu Afonso de Jesus, Diretór Nasional Polísia Sientifika Investigasaun Kriminál (PSIK), Hermengildo D. da Cruz, Komandante Sentru Formasaun Polísia Superintendente Julio Hornai nomos Ofisiais Superior, Sarjentus, Ajentes ho familia tomak Komandu PNTL.

Ajente rekruta foun 260 hahú formasaun

“Prosesu rekrutamentu ne’e la’o ho justu, onestu, no transparansia tamba PNTL servisu hamutuk ho Ministeriu Edukasaun, Ministeriu Saude, Guarda Nacional Republicana (GNR), nomos akompaña husi membru Parlamentu Nasionál Komisaun B, Komisaun Apoiu Tékniku PNTL, Diretor Jeral Sekretariu Estadu Seguransa, Inspektor Jeral PNTL, karik publiku balun la satisfas ho prosesu rekrutamentu ne’e, komisaun prontu atu esplika.”

Superintendente Xefe **Julio Hornai**
Komandante Centru Formasaun Polisia

Centru Formasaun Polisia (CFP), Polisia Nasionál Timor-Leste marka tan istoria ida ba dezvoltamentu PNTL nian, tama tinan foun 2015, CFP hala’o tan abertura ba kursu 30 ba ajentes rekruta foun hamutuk 260 ne’ebe kompostu husi mane 221 no feto 39 hahu formasaun ba faze dahuluk, iha faze segundu ba ajentes rekruta seluk sei tama fali iha tinan 2016, tuir planu Governu nian.

Ajente rekruta hirak ne’e dezloka ba Rairobo-Atabae, Munisípiu Bobonaro iha loron Sabadu (17/01/2015) hodi kontinua formasaun báziku durante fulan 2 ne’ebe hahú husi 16 Janeiru to’o 12 Marsu 2015.

Durasau formasaun ba ajentes rekruta sira durante tinan 1 (ida) ne’ebe kompostu husi fulan 2 iha Rairobo-Atabae-Bobonaro, fulan 8 iha Centru Polisia Dili, no fulan 2 ba hala’o estajiu, hafoin mak graduasaun hodi sai ajente polisia iha instituisaun PNTL.

“Ita loke tan kursu ba formasaun ajentes ba dala 35 ho totl klase 81, numeru ida ne’e konta hahu husi loke Centru formasaun, maibe konta husi GNR koopera ho CFP mak foin ba dala 3,” afirma Supt. Julio.

Prosesu formasaun baziku iha Rairobo iha kursu 30 ne’e, instrutor husi PNTL rasik hamutuk 47 no nain 9 husi GNR hodi fo asisténsia.

Komandante CFP akresenta, prosesu rekrutamentu ba ajentes foun PNTL iha tinan 2014 la’o ho transparansia no rigoro, bainhira ema balun iha dúvida kona-ba prosesu ne’e, komisaun prontu atu esplika.

Iha fatin hanesan, Sekretariu Estadu Seguransa Francisco Guterres iha nia diskursu hateten, rekrutamentu ba ajentes foun ne’e liu husi faze normal no rigoro atu bele hetan

kadetes ne’ebe di’ak hodi reforsa PNTL.

Francisco hatutan, iha PNTL laiha demokrasia maibe kumpri regras, kumpri ordem, tenke disiplina hodi prontu atu servi ba rai ida ne’e.

“Imi mak iha duni vokasaun atu sai polisia, tamba entre número 12.419, to’o ikus ita boot sira mak passa iha selesaun ne’ebe rigoro ne’e, ha’u hatu’o parabens ba imi, no fiar an hodi tuir formasaun ho di’ak hodi sai duni polisia, hafoin tuir formasaun durante tinan ida,” apela Francisco Guterres iha serimonia abertura ba kursu refere.



Ajente Rekruta PNTL tinan 2015 Kanta Hino Nasional Patria-Patria iha postu IV atu ba tuir formasaun báziku iha Rairobo.



mas Maria Rodrigues/PNTL

Apoi u husi



*Empowered lives.
Resilient nations.*



**From
the People of Japan**